

### 普賢三昧品第三

大方廣佛華嚴經卷第七

文有六分· 第一、三昧分· 第二、加持分· 第三、起定分·

第四、作證分· 第五、毛光讚德分· 第六、大眾偈請分。

宗趣者：入法界定，法界佛加為宗· 令法界眾成法界德為趣·

望於後品，亦說世界海為趣。

若準梵本·【普賢三昧威德神變品】· 威德神變皆定之用· 攝用從體但云三昧也。

▲縱佛加光讚皆因定故· 餘會入定受加，起定即說，同為一品。

今此開者，文多義廣，勸修學故。言義廣者，建立普賢之行願故·

故此比餘，麁相而說，四同六異。

言【四同】者：入、住、加、出。

言【六異】者：一、數異：餘會入起唯一· 此會入起俱多故。

二者類異：類餘方故·

三、利益異：定起多人益故·

四、光讚異：如來毛孔光明讚故·

五、眾請異：從定起已待眾請故·

六、證相異：餘會經終方有證相· 此品益已，即便地動雨雲等故。

\* 四，五二種，十地雖有而不具六· 今此具六故別立品· 以此說果· 餘皆因故·  
又為諸會本故、總故。七八九會雖是果定· 說通因果· 又非總故。

第一、三昧分：1 承力入定， 2 彰定名， 3 明體相用，先此界，後類通

1 爾時，普賢菩薩摩訶薩於如來前，坐蓮華藏師子之座，承佛神力，入於三昧。

2 此三昧名：【一切諸佛毗盧遮那如來藏身】，

3 普入一切佛平等性，能於法界示衆影像； (體用對)

廣大無礙，同於虛空；法界海漩，靡不隨入； (深廣對)

出生一切諸三昧法，普能包納十方世界； (出納對)

三世諸佛智光明海皆從此生，十方所有諸安立海悉能示現； (境智對)

含藏一切佛力解脫諸菩薩智，能令一切國土微塵普能容受無邊法界 (含容對)

成就一切佛功德海，顯示如來諸大願海；一切諸佛所有法輪，流通護持，

使無斷絕。 (成持人法對)

(類通十方)

如此世界中，普賢菩薩於世尊前，入此三昧；如是，盡法界、虛空界，十方三世，微細無礙，廣大光明，佛眼所見、佛力能到、佛身所現一切國土，及此國土所有微塵，一一塵中有世界海微塵數佛剎，一一剎中有世界海微塵數諸佛，一一佛前有世界海微塵數普賢菩薩，皆亦入此一切諸佛毗盧遮那如來藏身三昧。

第二、加持分：1 口加 2 意加 3 身加

1 爾時，一一普賢菩薩，皆有十方一切諸佛而現其前。

彼諸如來同聲贊言：「善哉！善哉！善男子！汝能入此一切諸佛毗盧遮那如來藏身菩薩三昧。佛子！此是十方一切諸佛共加於汝，以毗盧遮那如來本願力故，亦以

汝修一切諸佛行願力故。所謂：能轉一切佛法輪故；開顯一切如來智慧海故；普照十方諸安立海，悉無餘故；令一切衆生淨治雜染，得清淨故；普攝一切諸大國土，無所著故；深入一切諸佛境界，無障礙故；普示一切佛功德故；能入一切諸法實相，增智慧故；觀察一切諸法門故；了知一切衆生根故；能持一切諸佛如來教文海故。」

## 2 爾時，十方一切諸佛，即與普賢菩薩摩訶薩

【能入一切智性力智， 與入法界無邊量智， 與成就一切佛境界智，  
與知一切世界海成壞智， 與知一切衆生界廣大智，  
與住諸佛甚深解脫無差別諸三昧智， 與入一切菩薩諸根海智，  
與知一切衆生語言海轉法輪辭辯智， 與普入法界一切世界海身智，  
與得一切佛音聲智。】

如此世界中，如來前，普賢菩薩蒙諸佛與如是智；如是，一切世界海，及彼世界海一一塵中，所有普賢，悉亦如是。何以故？證彼三昧法如是故。(類通)

## 3 是時，十方諸佛，各舒右手，摩普賢菩薩頂。 (以下明『手之相用』)

其手皆以相好莊嚴，妙網光舒，香流焰發。 (德相圓滿，)

復出諸佛種種妙音，及以自在神通之事；過、現、未來一切菩薩普賢願海，一切如來清淨法輪，及三世佛所有影像，皆於中現。 (妙用自在)

如此世界中，普賢菩薩爲十方佛所共摩頂；如是，一切世界海，及彼世界海一一塵中，所有普賢，悉亦如是，爲十方佛之所摩頂。 (結通)

### 第三，起定分，先此界，後類通

爾時，普賢菩薩即從是三昧而起。(以下：眷屬定)

從此三昧起時，即從一切世界海微塵數三昧海門起。

所謂：從知三世念念無差別善巧智三昧門起，從知三世一切法界所有微塵三昧門起，

從現三世一切佛刹三昧門起，從現一切衆生舍宅三昧門起，

從知一切衆生心海三昧門起，從知一切衆生各別名字三昧門起，

從知十方法界處所各差別三昧門起，

從知一切微塵中各有無邊廣大佛身雲三昧門起，

從演說一切法理趣海三昧門起。

(益眾)

普賢菩薩從如是等三昧門起時，其諸菩薩一一各得：

世界海微塵數三昧海雲、世界海微塵數陀羅尼海雲、世界海微塵數諸法方便海雲、

世界海微塵數辯才門海雲、世界海微塵數修行海雲、 (以上五得菩薩法門)

世界海微塵數普照法界一切如來功德藏智光明海雲、 (以下四得佛果法)

世界海微塵數一切如來諸力智慧無差別方便海雲、

世界海微塵數一切如來一一毛孔中各現衆刹海雲、

世界海微塵數一一菩薩示現從兜率天宮歿下生成佛轉正法輪般涅槃等海雲。

如此世界中，普賢菩薩從三昧起，諸菩薩衆獲如是益；如是，一切世界海，及彼世界

海所有微塵，一一塵中，悉亦如是。 (類通)

#### 第四，作證分

爾時十方一切世界海以諸佛威神力，及普賢菩薩三昧力故，悉皆微動。(世界微動)

一一世界衆寶莊嚴，(衆寶莊嚴)

及出妙音演說諸法。(出音說法)

復於一切如來衆會道場海中，普雨十種大摩尼王雲。何等爲十？所謂：(佛會雨寶)

妙金星幢摩尼王雲、光明照耀摩尼王雲、寶輪垂下摩尼王雲、

衆寶藏現菩薩像摩尼王雲、稱揚佛名摩尼王雲、

光明熾盛普照一切佛刹道場摩尼王雲、光照十方種種變化摩尼王雲、

稱讚一切菩薩功德摩尼王雲、如日光熾盛摩尼王雲、悅意樂音周聞十方摩尼王雲。

#### 第五，毛光讚德分

普雨如是十種大摩尼王雲已，一切如來諸毛孔中咸放光明，於光明中而說頌言：

「普賢遍住於諸刹，坐寶蓮華衆所觀，一切神通靡不現，無量三昧皆能入。

(以下別顯遍相，8偈。末偈結讚所由)

普賢恒以種種身，法界周流悉充滿，三昧神通方便力，圓音廣說皆無礙。

一切刹中諸佛所，種種三昧現神通，一一神通悉周遍，十方國土無遺者。

如一切刹如來所，彼刹塵中悉亦然，所現三昧神通事，毗盧遮那之願力。

普賢身相如虛空，依真而住非國土，隨諸衆生心所欲，示現普身等一切。

普賢安住諸大願，獲此無量神通力，一切佛身所有刹，悉現其形而詣彼。  
一切衆海無有邊，分身住彼亦無量，所現國土皆嚴淨，一剎那中見多劫。  
普賢安住一切刹，所現神通勝無比，震動十方靡不周，令其觀者悉得見。  
一切佛智功德力，種種大法皆成滿，以諸三昧方便門，示已往昔菩提行。  
如是自在不思議，十方國土皆示現，爲顯普入諸三昧，佛光雲中贊功德。」

## 第六，大眾讚請

爾時，一切菩薩衆皆向普賢合掌瞻仰，承佛神力，同聲贊言：

「從諸佛法而出生，亦因如來願力起，真如平等虛空藏，汝已嚴淨此法身。

（以下：5 偈歎普賢因果深廣， 3 偈歎能遍塵刹雨法德，

第 9 偈舉法請正陳所疑，末偈歎眾請有堪聞之器）

一切佛刹衆會中，普賢遍住於其所，功德智海光明者，等照十方無不見。  
普賢廣大功德海，遍往十方親近佛，一切塵中所有刹，悉能詣彼而明現。  
佛子我曹常見汝，諸如來所悉親近，住於三昧實境中，一切國土微塵劫。  
佛子能以普遍身，悉詣十方諸國土，衆生大海咸濟度，法界微塵無不入。  
入於法界一切塵，其身無盡無差別，譬如虛空悉周遍，演說如來廣大法。  
一切功德光明者，如雲廣大力殊勝，衆生海中皆往詣，說佛所行無等法。  
爲度衆生於劫海，普賢勝行皆修習，演一切法如大雲，其音廣大靡不聞。  
國土雲何得成立？諸佛雲何而出現？及以一切衆生海？願隨其義如實說。  
此中無量大衆海，悉在尊前恭敬住，爲轉清淨妙法輪，一切諸佛皆隨喜。」